

摛藻堂四庫全書薈要

集部

欽定四庫全書叢要

集部

御覽經史講義卷二十八

詳校官編修臣汪鏞

欽定四庫全書

御覽經史講義卷二十八

集部

史

唐高祖武德九年置宏文館

少詹事臣沈德潛

尹起莘曰太宗初政如日方升纖翳不作其清明氣象至今可想綱目書置宏文館初無美詞而分注備載其君臣論治之實後之欲考太宗之治者

當於是焉觀之則得其要領矣

臣謹按高祖武德四年秦王開館以延文學之士
杜如晦以下十八人為文學館學士時人既謂之
登瀛洲矣至是復置宏文館選天下文學之士更
日宿直聽朝之隙講論前言往行商確政事此初
政之善也嘗思太宗弱齡起兵輔高祖定天下純
乎武功疑於文教有所未暇及觀有天下以後於
禮樂刑政之屬甚詳且備由左右翼贊之士所以

薰陶其耳目厭飫其心思者皆用人聽言仁厚節
儉之方也綱目書置宏文館分注詳悉如魏徵之
箴以虛己孔穎達之誨以受言杜正倫之記言無
隱裴矩之不為面從一一備載而太宗之以誠待
人不尚權詐正本止盜不用重法至比刻民於割
肉充腹例縱欲於剖身藏珠君臣誠勉諄諄懇懇
宜行之二十年風俗更易民安富教馴至回心而
嚮道也則文治之功顧可少耶且其時諸學士中

仕於隋者居多如裴矩隋之佞人也乃佞於隋而忠於唐臣之品量固視君德為轉移者耶抑君求士士益求君則夫羣才踴躍而元首端拱者固在明良之合德者耶迨中宗景龍二年置修文館學士選李嶠等善為文者為之而不講求政治宜天下爭以華辭相尚而儒學忠讜之日遠也則以太宗所尚者因文求道而中宗所尚者祇在乎文也此治術之所以相懸也與後玄宗開元三年置侍

讀官太常卿馬懷素散騎常侍褚無量更日侍讀
而經術疑義得以質問十年置麗正書院延禮文
儒發揮典籍十三年更集仙殿為集賢殿輕神仙
之憑虛重賢者之助理綱目並書以美之於時開
元之治有貞觀遺風豈非太宗貽謀之善為之後
者得以觀感而興起也哉夫太宗君臣之相勗者
足以興道致治而不惟文辭之彪炳如此可云有
高世主之烈矣然當日之交修者惟求度越秦漢

以下而未聞力求堯舜所以治天下之道猶非責
難陳善之極則也誠使為君者本有堯舜之聰明
堯舜之盛德矣而為之臣者於講求文學之餘復
能事事引君當道借古以鑒今因得以防失欽哉
四鄰朝夕納誨如鳥之有翼如木之植土如魚之
得水漸焉漬焉久而化焉治道之純不自知其入
於堯舜之域也此豈太宗君臣所可等量而齊軌
也夫

史

唐太宗貞觀元年以戴胄為大理少卿上以選人多詐冒資蔭敕令自首不首者死未幾有詐冒事覺者上欲殺之胄奏據法應流上怒曰卿欲守法而使朕失信乎對曰敕者出於一時之喜怒法者國家所以布大信於天下也陛下忿選人之多詐故欲殺之既而知其不可復斷之以法此乃忍小忿而存大信也上曰卿能執法朕復何憂胄前後犯顏執法言如涌

泉上皆從之天下無冤獄將軍長孫順德受人餽絹
事覺上於殿庭賜絹數十匹大理少卿胡演以為不
可上曰彼有人性得絹之辱甚於受刑如不知愧一
禽獸耳殺之何益

監察御史臣孫灝

臣謹按戴胄之事法中之平也長孫順德之事法
外之變也昔者漢文帝蓋嘗行此矣釋之犯蹕之
議卒從廷尉此與戴胄之執法同張武受賂事覺

愧以金錢此與長孫之得絹同唐太宗其有慕於漢文之遺風歟然而茲二事者其一得之而微有失其一則失之實甚而不可以示天下何則選人詐冒據法應流胄於是乎能守法矣太宗不以敕令既行奪人臣之守太宗於是乎能平法矣其用戴胄之言無異漢文聽釋之之請此從諫如流之盛德所以為得也其微有失者在不審於降敕之初耳若夫胄之犯顏執法天下無冤亦庶幾釋之

之為廷尉矣獨其言曰敕者出於一時之喜怒法者國家所以布大信於天下夫法東於成憲而敕秉於時王敕之不可輕猶法之不可易也書曰令出惟行弗惟反今以大號之渙巽命之申吐德音下明詔而曰是出於一時之喜怒然者豈端本之論乎釋之之告文帝曰方其時上使使誅之則已宋儒楊時以為是開人主妄殺之端胄說之未安亦略相似故曰得之而亦微有失也至於長孫順

德以贖貨之愆蒙賜絹之惠事不倫矣乃謂得絹
之辱甚於受刑如不知愧殺之何益夫不辱之以
罰而辱之以賞不愧之以迹而愧之以心或亦帝
王振勵末俗之微權偶一行之而已然而偶一行
之者即其事之不可以行者也人心所繫莫大於
是非國憲所昭莫切於懲勸韓昭侯以敝袴之細
留待有功雖風似嗇陋而君子猶有取焉今也受
絹而蒙賜將何以處夫却絹者以受絹之一人而

賜之數十匹又何以處夫受絹之輩之踵相接者
賜均則禁不行賜偏則令不一且此賜也誠予之
乎偽予之乎則必曰偽予之矣烏有人主之尊而
示人以偽者哉其用恩為不測不測非所以為教
也其命意為過深過深非所以為法也漢文用柔
道以治天下張武金錢吳王几杖蓋同出於寬厚
長者之意太宗追慕前古亦遂踵而行之故今日
為賜絹他日為縱囚是皆所以沛殊澤播休聲而

不知以彰一時之權則可以垂萬世之式則不可
也故曰其失實甚也要而論之治貴得中而已罰
必當罪法但如是而必從而甚之者非也故其從
戴胄者為持法之公也賞必有功法不應如是而
故從而矯之者又非也故其賜長孫順德者非用
法之正也雖然由前之說是謂過義由後之說是
謂過仁仁可過也義不可過也與為過義母寧過
仁太宗亦仁主也哉

--	--	--	--	--	--	--	--

史

上謂太子少師蕭瑀曰朕少好弓矢得良弓數十自謂無以加近以示弓工乃曰皆非良材朕問其故曰木心不直則脉理皆邪弓雖勁而發矢不直朕始悟向者辨之未精也朕以弓矢定天下識之猶未能盡况天下之務其能徧知乎乃命京官五品以上更宿中書內省數延見問以民間疾苦及政治得失

編修臣錢本誠

臣謹按致治之要莫大乎窮天下之理達天下之情夫人主聰明天縱學問高深萬非臣民所能及然而庶物之理以專而精生民之情以熟而悉故以至聖而詢於至愚合衆人之見聞以成一人之濬哲者明之至公之極也唐太宗以英武定天下乃因弓工一言知物理無窮而智不足特於是清問羣臣博求讜議借以溫言得從容自便使事無遺理民無隱情此貞觀之治所以比隆三代歟然

此非獨君道宜爾也即為臣者亦然蓋臣能從善
然後能善君漢諸葛亮曰凡有忠慮於國者但勤
攻我之闕則事可成唐太宗謂羣臣曰朕欲公等
諫公等亦宜受人諫不可以已之所欲惡人違之
夫朝廷重臣總領天下封疆大吏統轄數千里其
間民風土俗因時異宜苟非開誠布公集思廣益
豈能事事允協而乃體統尊嚴耳目壅蔽屬員進
見唯諾惟謹苟出一令雖有不便務相承奉稍或

直言忤意非明斥即暗棄之如是而欲求政理得
宜民情悅暢無是理矣此風既長雖以守令親民
之官而不能親民講約聽訟而外不復與士民相
見惟藉吏胥以為耳目奸民地棍得以簧鼓其說
而良士結舌而不敢伸愚民含冤而無所告矣臣
以為小臣宜虛公以採士民之輿論大臣亦宜虛
公以受屬吏之直言凡事必詳悉講明得其利害
之實而後入告於天子天子折衷於至當而施行

之所謂用中於民此聽言之法也至於進言者受朝廷之延訪尤當竭忠盡慮據實秉公宋司馬光云居言職者當誌其大舍其細先其急後其緩專利國家而不為身謀又云任事者當置身利害之外言事者當置身利害之中蓋古名臣之用心如此若乃任意見之偏拾瑣屑之務誇其利而隱其害舉其得而諱其失言之則愷切而可聽行之則紛擾而無益甚或明知其不可行而姑言之以塞

其責既見其不可行而堅持之以遂其過何其忍於欺罔而不忠之甚也夫人臣讀聖賢之書當咸明之世言朝得於上則四海之內夕被其澤其亦何所瞻顧而不以忠言至計直陳君父之前哉總之上以誠求下以實應君臣同德通天下為一身三代以上致治之要實在於此非特貞觀而已也

史

上謂太子少師蕭瑀曰朕少好弓矢得良弓數十自謂無以加近以示弓工乃曰皆非良材朕問其故曰木心不直則脉理皆邪弓雖勁而發矢不直朕始悟向者辨之未精也朕以弓矢定天下識之猶未能盡况天下之務其能徧知乎乃命京官五品以上更宿中書內省數延見問以民間疾苦及政治得失

檢討臣傅隆阿

臣謹按聖王之治天下也民無難言之隱物無或遁之情且能使天下之人樂事勤功效致而不倦故觀其朝則謨明弼亮盡耳目股肱之益也觀其野則養欲給求盡飲和食德之休也虞書曰明四目達四聰周書曰爾有嘉謨嘉猷則入告爾后於內爾乃順之於外誠能得其要領矣唐太宗聰明神武起自我行宜於天下之事罔勿周知乃於即位之初延見羣臣訪民疾苦諮詢治得失臣以為是

道也一舉而三善備焉何也人主端拱深宮尊榮
安富其於小民作苦胼手胝足之狀雖無時不厪
於懷究不得躬履田間目覩其事故發號出令或
宜於古而不宜於今或宜於此而不宜於彼風土
所關俗尚所習雖甚聖明豈能盡悉惟於清晏之
時屢勤諮詢參伍以盡其變執兩以用其中則下
情上達而庶政無不舉矣其善一也且夫庶司百
職所事不同而人品亦因之以異其恪守職業者

固亦有人其怠惰偷安有玷厥職者亦正自不乏
雖有大吏稽察之法三年考核之規然其人或浮
華奔競足以投大吏之所好而欺世盜名或直魯
樸誠不足以投大吏之所好而難以表見使得不
時延見各盡所長以至公之盛心察羣僚之情偽
則其人之賢否亦因之立辨矣其善二也至於人
之精神志氣引之則日生置之則日縮士當伏處
草茅每慮無以自効及至有官有守有言責反怠

棄自甘不克振奮者亦由因循習染積累而成也
聖人御世羣策羣力兼收並蓄智者得以效其謀
勇者得以竭其力彼百司庶府一經召對儻有漫
不經心之事既無以仰答聖明又無以保其祿位
自宜夙夜黾勉敬修厥職矣賞一人而天下勸罰
一人而天下懼大易所謂鼓之舞之以盡神者此
其善三也或者慮不時召對未免有迂濶鮮當煩
賈聽聞抑或有挾私懷詐所奏不實之弊不知事

之可否行之緩急在君人者斟酌審量於其間非
必有聞而遂行也若其言之公私情之真妄又豈
能逃王者洞鑒之外哉太宗之意亦猶是詢岳開
門懸詔設鐸之心耳此三代而後貞觀猶為近古
也

史

唐太宗曰人欲自見其形必資明鏡君欲自知其過必待忠臣

監察御史臣張渭

臣謹按自古帝王未有生而無過者堯舜性之之聖固所稱美善兼盡而無過者矣乃不自以為無過而深責之臣隣曰予違汝弼汝毋面從夫違者過之謂也既無過何有違苟無違又安用弼乎若

是則聖人之無過聖人初不自知其無過而且以
日知其有過為幸也堯舜且然湯武以下之不恠
改過者其皇皇然求知更無論矣蓋人苦不自知
返視之明恒不如借鑒之明內省之識恒不及外
觀之識彼夫形之有妍媸也醜好也是生人之所
顯而易見者也顧其所以顯而易見者由時時有
暴吾之妍媸別吾之醜好炯然昭布森列於其前
若十目十手之指視雖欲掩藏而不可得者則明

鏡之力為多也設一旦離乎鏡抑鏡或昏而不明
竊恐妍媸猶是好醜猶是而夙昔之所灼見於中
而莫之淆者漸且惝恍焉而無憑矣其不至以媸
為妍而以醜為好者幾何哉雖然不見其形其失
止在形而猶未足為心累也生於其心而害於其
政者惟過之所積為甚微而惟人君之過之所闢
為甚鉅君有過君不知之而臣知之亦非衆臣所
能共知之而惟忠臣能知之何則忠臣者君之明

鏡也平日一絲不雜誠精故明一物不擾靜虛則明既先以戒欺求慊者於吾心澄其本體自克以繩愆糾謬者於君身致其實用是故君之過方萌惟若臣為能防其微君之過將長惟若臣為能杜其漸獻可替否如物來而畢應拾遺補闕亦屢照而不疲明則察乎秋毫鑒則洞乎肝膈有臣若此為之君者其庶幾可以立於無過之地矣不然者小人大詐若忠每事容悅姑勿論其顛倒是非變

易黑白以陷君於過也凡舉朝不敢言人主不樂
聞者悉付模稜略無匡救此無異抱塵鏡以求形
之正其又何形之能見哉故太宗之論篤矣他日
因魏徵之沒而復申其說曰以銅為鑑可正衣冠
以古為鑑可知興替以人為鑑可知得失彼之所
謂人者要非泛屬諸他人也必魏徵乃不愧為忠
臣必忠臣乃不愧為明鏡此可以參觀而得其旨
矣

史

唐太宗貞觀二年詔舉堪縣令者上曰為朕養民者惟在都督刺史朕嘗疏其名於屏風坐卧觀之得其在官善惡之跡皆注於名下以備黜陟縣令尤為親民不可不擇乃命五品以上各舉堪為縣令者以名聞

編修臣秦勇均

臣謹按郡守縣令代天子撫黎元宣德意卽疾苦

平訟獄勸農桑興教化使民賴其利以安其身家
性命者也唐太宗以武功定天下喜功好大寧無
動衆勞民之舉而其後休養生息民皆殷阜至於
斗米三錢外戶不閉貞觀之治幾於成康其本在
乎任賢納諫數大端而其要在乎謹擇守令惠養
百姓蓋其與民休戚之意時往來於懷而不去故
吏亦勉為循吏此屏風錄名誠為三代以下愛民
之盛事也且夫屏風錄名固不惟其事而惟其心

也人主誠汲汲於愛民惟恐牧民者有負所托則雖深居九重無時而不繫念民生之疾苦將守令賢否時刻銘之心版固不在區區屏風之書名所謂參前倚衡也不然者詔令皆為具文選舉僅循成例縱慕古賢君之所為坐卧屏風之旁往復姓名之數觸於目而不警於心於民何益焉故非實有愛民之心者必不能擇吏而非確有擇吏之識者亦不能愛民也吏得其人則郡國晏安嘉惠流

被閭里勿煩苦而鄉亭無夜呼若不得其人將不循職守貪賄殘刻政治乖戾和氣不興萬民喁喁安所仰恃夫大田之詩其言治田也曰去其螟螣及其蟊賊非特田有蟊賊也政亦有之害民之吏是也欲田之登必先去其害稼者欲民之安必先是其害民者吏之害民其才短者其害猶淺其才長者其害滋深蓋才短之人止於懦鈍法令不嚴而民或生玩然使其人操守素嚴誠樸自矢則與

民相習之深猶望其有感孚之效與事相練之久
猶望其有才識之增若夫才長而心術不端者以
殘刻為強幹以紛擾為才能苟可逢迎上官雖疲
民之力而不顧苟可希冀遷擢雖賊民之生而不
辭此擇吏者不在於擇能吏而在於擇良吏不在
於簿書期會之著其績而在農桑教化之盡其心
也漢時良吏最多或起於方正之科或試以公卿
之薦是以吏道純而民氣和也唐太宗令五品以

上各舉堪為縣令者亦有漢之遺風誠於常格之外廣為採訪以求得人其現在身膺民社有實稱循良之選非徒世俗之所謂才能者許在朝鄉貳在外郡守以上各舉所知以待核實而加之優獎則天下之大萬民之衆得良吏數十人引養引恬於其間疇不觀感奮興以期仰副子惠元元之至意而治效所臻有不軼漢唐而上者哉

史

貞觀四年秋七月乙丑上問房玄齡蕭瑀曰隋文帝何如主也對曰文帝勤於為治雖性非仁厚亦勵精之主也上曰公得其一未知其二文帝不明而喜察不明則照有不通喜察則多疑於物事皆自決不任羣臣朕則不然擇天下賢才寘之百官使思天下之事關白宰相審熟便安然後奏聞有功則賞有罪則刑誰敢不竭心力以修職業何憂天下之不治乎

編修臣張為儀

臣謹按唐太宗之論可謂識治體矣夫以四海之廣萬幾之衆而皆待治於人主之一身此雖以至聖之聰明才力亦不能周知而徧及也故必審擇輔弼大臣以共襄其事而大臣又慎簡乃僚以各効其能然後綱舉目張而庶官無曠苟於用人之始擇之不審則其信之也不專信之不專則其任之也不重以公卿之尊而稽察檢制幾同胥吏則

彼為之臣者上懼君心之疑下慮讒口之衆畏憇
顧望拘牽寡斷固勢所必然耳由是事無大小政
無鉅細莫不取決受成於君而人君以一身欲盡
理天下之事頭緒繁冗棼若治絲前後之際易致
遺忘詔令所頒遂多舛錯大臣不敢進言諫官莫
敢執奏坐使奸胥猾吏反得上下其手而倚法行
私朝四暮三不可致詰此萬事所由叢脞也苟卿
云主好要則百事詳主好詳則百事荒此之謂也

然而推原其故實由於不明蓋人君義理不先定
則於事之本末大小既未能權衡得中而於任事
之臣其智愚賢否亦未能洞悉情狀勢不得不舍
詢事考言之典而間用逆億以自炫其聰明加以
讒諂之徒又從而乘之毛舉細微曲摘幽隱其始
因疑而喜察其繼因察而愈疑禁令紛紜上下睽
隔重傷國體寢失人心皆不明之所致也故書曰
知人則哲能官人易曰知臨大君之宜吉誠以君

道之貴明也是以古之聖王於深宮無事之時上
稽天若下畏民碧奸聲亂色不留於聰明淫樂慝
禮不接於心術務使其志氣惺然常有以自主譬
之鏡焉有所蒙則不明去其蒙而物來胥照矣譬
之水焉有所淆則不明澄其原而遇象呈形矣然
猶恐事幾至衆其可否是非之介或未能盡明也
又必日與賢士大夫從容講論往復辨折不獨理
義有所折衷即人情物態風土異宜廣諮博採無

不周悉故於其心之未發也廓然而虛公其既發
也油然而順應以天下之才任天下之事建以六
典馭以八柄賞罰明而刑政肅綱紀正而風俗醇
唐虞之翕受敷施成湯之經德秉哲文武之克知
灼見胥是道也嘗考唐太宗初政以房玄齡杜如
晦為相軍國大事無不諮詢之復置宏文館精選天
下文學之士令更日宿直聽朝之隙講論前言往
行商榷政事又數引魏徵入卧內訪以得失其上

書言事者皆粘之屋壁出入省覽於時孫伏伽李
乾祐等以直諫擢官張元素李大亮等以直諫受
賞其用人惟己之美史不絕書故得賢者在位能
者在職人民和樂天下昇平三代以下推為賢主
惟其能得為政之大體也故宋儒程子曰論學便
要明理論治便須識體

史

唐太宗貞觀四年冬大有年

侍講學士臣沈德潛

范祖禹曰魏徵仁義之說欲順天下之理而治之
封德彝刑罰之言欲拂天下之性而治之太宗從
魏徵而不從德彝行之四年遂致太平仁義之效
如此其速也

臣謹按大有年何以書志盛也志盛者何美夫人

之相應也天人之相應何以徵徵於唐太宗之却側言從正論實能以恤民者格天而天旋以仁民者報君也先是魏徵勸太宗以德化民而封德彞進以秦漢法律雜霸之術謂書生虛論不足以治澆訛之俗也徵力破其說而謂五帝三王不易民而治行帝道而帝行王道而王其言辨其論正矣帝從徵言而次第行之重農桑蠲租賦赦眚災出宮女禁獻祥瑞除鞭背刑凡足以救災利民者皆

切於乃身而行之惟恐不力迨行之四年而天下
大稔斛米三錢東南嶺海間至於外戶不閉行旅
不齎糧也此得於設誠致行之後者也且夫天之
仁愛人君猶父之仁愛其子必先以艱難勞勸試
之者也貞觀元年山東以旱告矣二年閩內以旱
饑告畿內以蝗告矣三年復以大水告矣使太宗
求治之心未專尠不謂天道之難以感通仁義之
果出於迂遠者乃當日勤而撫之而不少悔其從

善救時之初心所以災轉為祥禍變為福天鑒其誠民受其賜不期效而效即隨之也與蓋嘗思之天之於人其相去甚近其相通甚捷即匹夫為善天必有以報之而况天子於天論德則為肖子論位則為宗子為宗子則能代天之職為肖子則能體天之心從古以來無建皇極而不致敘福之錫念庶徵而不臻平康之治者是以陰陽調而風雨時羣生和而萬民殖史書大有人君可操券必之

而非得之偶然者也貞觀之治近於三代豈非仁
義之明效大驗也哉抑又思太平之治固在於德
化而論治之日先決於聽言當封德彝折辯魏徵
其辭未嘗不娓娓可聽若法律雜霸之術真切當
於魏徵之議論也者惟人君定其志精其識一切
愴邪巧利之說不足以中之斯一德一心明明穆
穆以人感天而天即應焉果如慈父之愛其子而
求無不給者矣則致治之要尤在乎嚴君子小人

之分也哉有天下者法太宗而更上求純王之治
將大有年之書有屢書不一書者矣

史

唐太宗貞觀四年冬大有年

編修臣林蒲封

臣謹按史稱貞觀四年米斗不過三四錢終歲斷刑纔二十九人東至於海南及五嶺皆夜戶不閉行旅不齎糧取給於道路大有之盛如此然考之

唐初承隋末之亂武德以來兵革未息貞觀元年關中饑二年天下蝗三年大水民生彫敝極矣至

於四年即以大有特書治化之美流光史冊論者
以為魏徵勸行仁義之效如此其速也夫仁義固
足以致治而行之必在乎得人天下之大非一手
一足之烈明矣臣嘗深求其故竊於綱目所書貞
觀二年擇親民之官而知其政治之效所由速也
周官六卿分職各率其屬以倡九牧阜成兆民漢
宣帝曰庶民所以安其田里而無嘆息愁恨之聲
者政平訟理也與我共此者其惟良二千石乎董

仲舒曰郡守縣令民之師帥所使承流而宣化也
師帥不賢則主德不宣恩澤不流由此觀之守令
之所係者大矣太宗初政詔舉堪為縣令者其言
曰與朕養民者惟都督刺史至於縣令尤為親民
不可不擇命五品以上各舉以聞是時太宗虛己
勵精於上房杜王魏諸臣竭誠交贊於下詢事考
言登明選公中外承風勤求至理是以上無不達
之隱下無不逮之恩陰陽和而風雨時衣食足而

民俗厚僅及四年遂致太平向使守令非得其人
即有良法美意不過視為具文甚或藉以營私擾
衆者矣太宗雖賢烏能家喻戶曉身親致之於民
哉且夫水旱由於天時聖王所不能免惟有撫恤
之方得人而任之乃可轉危而為安易貧而為富
歷觀前古莫不皆然史稱漢初敦尚廉隅法網疎
濶為吏者長子孫至於文景海內殷富宣帝明於
察吏加意獎勸循良接踵為漢中興光武與民休

息首褒良吏東漢之盛教化風行唐玄宗初年引
見畿縣官戒以惠養黎民屢遣大臣巡訪之開元
之治與貞觀並此其明驗也故自古極亂之世得
賢守令足以保障一方者有矣未有守令不賢而
民能安其生者守令者一方之命也天下者守令
之積也守令皆賢則天下咸理矣盛世不借才而
治天下何患無人顧用之何如耳古人有言一介
之士苟存心利物無不有濟於時况奉天子命為

民父母以其急利祿之心而急國家以其謀身家
之力而謀百姓雖中材之質皆可勉為循良所謂
日計不足而月計有餘者也且天下之事有行於
古而不可行於今有宜於此而未必宜於彼者懸
而度之雖智必差畫而限之雖才亦絀惟守令之
職與民最親處置設施易中肯要舉凡課農桑厚
風俗抑豪強撫孤弱賑救災荒安集流散何一非
其職分之所當為惟在朝廷明敕大吏專責其成

公其賞罰寬其掣肘而徐以觀其效吏治未有不
淳民生未有不遂者叶氣嘉生薰為大和大有之
書不求自至本固邦寧何施不可將使仁義之澤
洽於四方時雍風動之休可復覩也寧僅貞觀之
米斗三錢而已哉

史

唐太宗貞觀六年秋閏七月宴羣臣於丹霄殿上曰
人主惟有一心而攻之者甚衆或以勇力或以辯口
或以諂諛或以奸詐或以嗜慾輻輳攻之各求自售
以取寵祿人主少懈而受其一則危殆隨之此其所
以難也

少詹事臣呂熾

范祖禹曰人主不可以有偏好偏好者奸邪之所

趨而讒賊之所入也書曰惟精惟一允執厥中夫如是則衆莫得而攻之矣

臣謹按天下之治忽係人主之一心心本虛靈而備萬善然不能不奪於嗜好攻取之私況人主之治心有倍難於常人者常人縱有外誘而處勢既卑不能悉遂其欲又從而攻之者亦寡以無利可邀也人主勢位既崇何求不遂而又操富貴爵祿之權得其歡心即可坐致顯榮是以巧以干進之

人日夜揣摩探其君性情之所近心志之所樂曲
為迎合冀其一當以邀厚利由是而攻之者衆矣
太宗所言勇力辯口諂諛奸詐嗜慾五事皆君心
之所易惑者也然五者不必全受但受其一已足
為害而五者之中嗜慾尤為易溺蓋紛華靡麗之
屬奇技淫巧之端所謂娛心志悅耳目者何限君
心一有所暗其初以為何傷而其流必至於難返
彼小人者窺伺而得其隙則將百計以求媚即諂

謀所由來也容悅既工奸謀易起巧言以惑衆罔
計國是之安危詐偽以營私惟顧身家之利害文
過飾非黨邪害正此又辯口奸詐之所以生故
嗜慾者受攻之隙而實為召攻之媒是以古聖垂
訓以寡慾為要以慎獨為功使吾心清明有如止
水守道凝固有若長城則邪僻無自而入而外侮
安敢相近哉太宗英雄之君於道未必深諳特其
聰明果決深燭治亂之機故聽言納諫衛正防邪

致治之盛為三代以下所僅見當此之時若更能
講明聖學克己復禮主敬存誠正心以正朝廷正
朝廷以正百官正百官以正萬民則治效所臻有
不與唐虞三代比隆哉

史

唐太宗問魏徵曰羣臣上書可採及召對多失次何也對曰臣觀有司奏事常數日思之及至上前三分不能道一况諫者拂意觸忌非陛下借之辭色豈敢盡其情哉上由是接羣臣顏色益溫

編修臣蔡新

臣謹按有唐賢君莫有過太宗者太宗之德以納諫為首稱史冊所載如孫伏伽戴胄之執法以爭

無殊於張釋之皇甫德參之激切上陳不異於汲
黯帝皆優容嘉納可謂盛德矣而魏徵猶勸帝假
詞色以受盡言者太宗以神武定天下即位之初
置館殿側聚四庫書二十餘萬卷選天下文學之
士令更日直宿講論前言往行商榷政事其天資
英邁博識古今當時廷臣才識未有能幾及之者
也意其臨朝之際或不免神聖文武之資稍形於
詞色故孔穎達以為位居尊極炫耀聰明則下情

不達諸臣召對之多失次三分不能道一其以此
歎然此猶就陳事者言之未及乎拂意觸忌而諫
者也拂意觸忌而諫者人臣之所極難也顯言之
則近於賣直諷言之則鄰於刺譏援引言之則疑
於迂疎激切言之又疑於毀謗總之皆逆耳也夫
君之於臣上下至懸殊也臣之爵祿君所賜也榮
辱君所定也不寧惟是即身家性命亦君所生全
也既已托命於君誰不願為將順之舉以自結於

戀主之情而獨甘為逆耳之言以嘗試於不測之威必其實有忠愛愷惻之忱不容自己者也不然則其賦性慙直者也不然亦其顧名思義者也不若是巧者必揣摩以迎合拙者亦緘默以取容矣李絳之對憲宗曰人臣死生繫人主喜怒誰敢發口諫者就有諫者亦皆晝度夜思朝刪暮減比得上達什無二三與徵所言意正相類是以明聖之君邇言有所必察陳言亦所不厭言及主躬不嫌

於過當言及時政無妨以過激即有一二無稽弗
詢之說亦但勿聽勿庸已耳夫豈無狂愚不知大
體以自觸罪悔者賴聖哲以免也太宗惟能聽受
故羣臣上書亦多可採而貞觀之時號稱盛治况
由此而上之為夏禹之懸輶置鐸大舜之善與人
同又有大焉者乎然則諫草之稀不必盛世直臣
之衆愈彰聖主讀臯益之謨可以觀矣

史

唐貞觀十年權萬紀上言宣饒二州銀大發采之歲
可得數百萬緡帝曰朕所乏者非財也但恨無嘉言
可以利民耳昔堯舜抵璧於山藏珠於谷漢之桓靈
乃聚錢為私藏卿欲以桓靈事我耶黜之

監察御史臣柴潮生

臣謹按治天下以義不以利而人主之所最易惑
而輕信者莫如言利之說夫易之言利於義之和

是乃以在人天然之利足以和義之利固未嘗舍乎義而專言利也若言利之臣則以因民之利為在上之利有顯背乎義而曲為之說者不知利者民之所同欲不務公之於民而欲私之財聚於上者民離於下自非英明果斷之君未有能默言利之臣而杜禍患之萌者也若唐太宗之黜權萬紀有足法者夫權萬紀所言宣饒二州銀大發采之可得百萬緡乃天地間山澤之利初非強取之百

姓者也而太宗斥之為言利遠思堯舜之抵璧投珠至以桓靈之聚錢私藏為戒者豈非謂興利必至於害民固不可以不防微而杜漸也哉蓋天地生財有數利不在官乃在於民民得其利財源通而有益於官官專其利則利源塞而必捐於民萬紀欲濟其私而言足以傷人害物其視君子之欲行其道而心存於天下國家者迥異矣是不以堯舜事其君而以桓靈事其君也其罪可勝誅哉書

曰朕不肩好貨鞠人謀人之保居敘欽太宗之言
近之矣臣嘗綜唐一代之治亂興亡而知太宗之
垂裕後昆者總在於利民而不專其利子孫變易
其法不特有害於民而實無益於國武德貞觀開
國之始授人以口分世業田而取之以租庸調之
法蓄兵以府衛兵雖多而無所損設官有常員官
不濫而易以祿量其入而出之以為用度由永徽
以至開元初年經常簡易無庸言利而國充財足

自明皇見海內完治偃然有開疆闢土之心宇文
融議取隱戶剩田以中主欲而利源開天寶以後
韋堅楊慎矜王鉷楊國忠剝下奉上歲進羨緡百
餘萬為天子私藏由是大厯建中貞元數朝瓊林
大盈庫建掌以中人而宰相不得問其盈虛元載
裴延齡輩害民蠹政釀成厲階以元和之英武精
明不能不惑於皇甫鏄程異之邪說雖裴度之信
任力爭而不見聽若鹽鐵轉運屯田和糴鑄錢括

苗權利借商進奉獻助無所不為立法愈煩而愈
弊民日困而用日匱以至於亡孟子所謂上下交
征利而國危者唐室其明驗也太宗之黜權萬紀
深切著明信為萬世之龜鑑也已且夫小人之敢
以言利之說進者何也彼謂國家承平乂安經費
滋多所憂者惟用度之不足以漢武之雄才大略
而不能不惑於桑孔神宗之大有作為而不能不
信於安石惟太宗知藏富於民之大義故顯默萬

紀而無所恤易曰渙王居无咎管子曰與天下同
利者天下持之是故興王所宜重為懲創以變天
下之貪邪者必自言利之臣始

欽定四庫全書

卷二十八

史

貞觀十二年九月甲寅上問侍臣創業與守成孰難房玄齡曰草昧之初與羣雄並起角力而後成之創業難矣魏徵曰自古帝王莫不得之於艱難失之於安逸守成難矣上曰玄齡與吾共取天下出百死得一生故知創業之難魏徵與吾共安天下常恐驕奢生於富貴禍亂生於所忽故知守成之難然創業之難既已往矣守成之難方當與諸公慎之

編修臣張為儀

臣謹按唐太宗一生固以創業而兼守成者也故於房魏二臣之說均有所取焉若夫世之論者每謂撥亂返正必得大有為之君而繼體守文者直可蒙業而安一若難易迥殊者此則未審思乎時勢者也以臣載觀史冊推其成敗之由竊見守成之難固有倍難於開創者請得而厯陳之夏書曰民惟邦本本固邦寧言國家之安危繫乎民也其

在開創之時天下初定戶口尚稀田產未盡闢也
山澤之利未盡取也為上者但能勞來勸相之則
天地之所施生原足給斯人之用况當瘡痍初復
民風尚樸民志未侈故積之數年漸臻富庶逮承
平既久而生齒日繁矣夫以百金之產一人用之
則寬然有餘及遞分之數人則恒苦不給此自然
之勢也加以雕文刻鏤之傷農事錦繡纂組之害
女紅者競相倣效以為矜誇踵事增華變本加厲

又安望其能餘一餘三以自封殖哉故當平居無事之時其謀生之計已無所不至設一遇水旱而弱者流離强者劫掠矣此承平後之民生所以難也說命曰股肱惟人良臣惟聖言君德之隆替視乎臣也其在開創之時將相大臣皆以厯試之才而受腹心之寄其與人主櫛風沐雨朝夕相親誼則君臣恩猶骨肉其信之也篤其任之也專其禮之也重故其時之臣莫不自思奮於功名以報其

上遇上有闕失則借箸而陳排闥以諫而無所嫌
忌於其間比及後世人主端拱於上百僚奔走於
庭召對則限以時點陟一憑其意由是尊者愈尊
卑者日卑其大臣惟以承順意旨為賢其小臣惟
以拘守簿書為恪其任司牧者惟以急徵賦稅為
公忠其居諫議者惟以毛舉細微為風力至於國
計民生之大則皆諉為君上之任而瞻顧依違苟
且塞責者此非承平時之人才遠遜於開國也蓋

以堂廉睽隔而上下之情不交禮節過煩而臣主之誼已薄故其憂國奉公之誠不足以敵其身家之念也逮至發言盈廷莫職其咎於是為人主者不得不隱授其權於左右近習以相為伺察而孰知所倚以為伺察者乃益以壅蔽其聰明故諂諛之風益盛而人主之勢愈孤此承平後之人才所以為難也禮記曰君子議道自己而置法以民言法之貴乎便民也其在開創之時如漢之三章唐

之十二條立法甚簡而守之甚堅簡故易從而堅
則莫犯其餘因時變通之制皆聽長吏之自為而
徐以觀其效洎乎後世科條日增文網滋密陳規
新例棼若亂絲有司日束縛於法之中而不敢稍
出一意偶值細事亦必由下而上自外及內文書
往復互相辨詰拘牽瑣碎寢失事機其意不過謂
徇人涉私而用法則公耳孰知案牘紛紜為長上
者勢難盡省必且反授其權於吏由是吏之所怒

則吹毛索瘢而例從其重吏之所喜則旁引曲証而例就其輕析律貳端朝三暮四坐使朝廷之刑賞特以佐吏胥之威福本期以人用法反至以法徇人上下相遁迄於不振此承平後之紀綱所以為難也繫辭傳曰何以守位曰人何以聚人曰財言財之貴乎恒足也其在開創之時憂勤之意深而嗜慾之端淺故雖賦稅均平而朝廷之經費自裕自時厥後狃於富厚之勢遂忘物力之艱宮庭

之內凡服食器用聲色玩好之屬所費漸廣而又
加以官爵之設日冗宗戚之祿日蕃兵卒之犒賞
日增木土之營造日衆其用於上者無節而取於
下者有制以有制之財而供無節之用勢將慮其
不繼必且舉天地間山林川澤之內苟可以取利
者胥籠而致之於是聚斂之臣進而掊克之說行
利盡於上則民匱於下故國不必遇水旱盜賊而
咨嗟愁嘆常若不安其生時不必有敵國外患而

補苴支綴常苦不足於用此承平後之財用所以
為難也凡此數端固由人事之舛誤亦繫氣數之
推遷自三代以來由盛而衰之故畧盡於此矣夫
無平不陂無往不復者天地之運也而制治未亂
保邦未危者帝王之政也惟賢聖之君能思天命
之靡常而念守成之不易清心寡欲以端其原旁
求俊乂以輔其德敦本崇儉所以厚民生也開誠
布公所以作人才也慎憲省成所以振紀綱也量

入為出所以節財用也如此則治者益治安者益安持盈保泰之道庶可比烈於成康矣然必先審知其難而後能慎終如始故易戒艱貞書稱知恤胥是道也夫以唐太宗之勵精圖治虛懷納諫洵推三代以下之賢主然其後魏徵上疏猶歷指其漸不克終者十事又謂往以未治為憂故德義日新今以既治為安故不逮然則守成之難不亦可以想見哉

史

上謂諫議大夫褚遂良曰卿猶知起居注所書可得觀乎對曰史官書人君言動備記善惡庶幾人君不敢為非未聞自取而觀之也上曰朕有不善卿亦記之耶對曰臣職當載筆不敢不記黃門侍郎劉洎曰借使遂良不記天下亦皆記之上曰誠然

編修臣周煌

臣謹按古者左右史官之設與諫官相表裏為用

者也諫官任耳目之司爭之於其口史官居左右之地筆之於其書爭之口者情激而辭嚴筆之書者旨幽而事著蓋爭之一時而書之在百世史官所掌匪細故也從來當明盛時君咨臣倣都俞吁咈上下相與孜孜各修其職遂臻治理及乎末造君驕於上臣謫於下有將順而無匡救載筆諸臣袖手就列而已故其主德鮮有善者唐太宗三代以下之令主也英姿大略赫赫當時而於其臣

褚遂良一則曰所書可得觀乎再則曰有不善亦記之耶臣每三復其言豈太宗有曲護已短之意歟毋亦瞿然深念懼天下後世之是非欲返觀而內鏡之也何以知其然也太宗嘗謂每臨朝欲發一言未嘗不三思恐為民害及聞杜正倫奏賜帛示獎然則太宗非護過者迄今覽遂良及劉洎之言何其有犯而無諱也君明則臣直其以是歟今夫史臣所紀非徒鋪張揚厲而已也景星卿雲之

屬必書之所以明有瑞也非其所自致能不愧乎旱乾水溢之屬必書之所以明有災也苟其所自致得不懼乎慶賞鼎鐘之及必書之所以明有恩也而若或濫之難免於物議矣刑罰刀鋸之及必書之所以明有威也而若或濫之難禁其羣訾矣下至一噲一笑一起一居出之者不及覺載之者務其詳蓋若是其嚴且慎也然則何為不自取而觀之也觀之其亦有觸目而警心者乎曰否人主

雖聖不能無過而既已言之既已行之苟從萬幾
餘暇屏去外緣理會片時便可尋得過處若所謂
觸目而警心者蓋如讀緇衣而生愛咏巷伯而生
憎非所語於左史之編右史之紀也藉令自觀其
書安知不從而怒其後耶雖怒其後而天下亦皆
記之於君何利獨惜其臣依違遷就不敢自盡其
職耳夫不盡其職者謂之曠官此遂良守道不如
守官之言更深切而著明者也蓋臣嘗論天下之

治忽闢乎主術之純疵而主術之純疵又自其心
之敬肆判之立之監佐之史莊敬之所以日強也
親佞人遠君子安肆之所以日偷也為清其敬與
肆之所從來則天地祖宗之憑臨子孫臣庶之法
守未嘗不於一言一動兆其幾也以故史官一書
人君不當以目遇而當以心遇也夫

史

見可欲則思知足以自戒將有作則思知止以安人
念高危則思謙冲而自牧懼滿溢則思江海下百川
樂盤遊則思三驅以為度憂懈怠則思慎始以敬終
慮壅蔽則思虛心以納下想讒邪則思正身以黜惡
恩所加則思無因喜以謬賞罰所及則思無因怒以

濫刑

編修臣彭樹葵

臣謹按天下之大繫於人主之一心而其要在思
洪範云思曰睿易有之君子思不出其位誠以思
者心之官君心正而後百度貞焉靜而存之在戒
懼動而察之在慎獨當其洗心藏密無息不與天
下之故相周是以典謨所載古大臣之告其君者
曰兢兢業業一日二日萬幾又曰安汝止惟幾惟
康勅幾之學慎思之謂也求之後世若魏徵之十
思疏其庶幾乎徵之言曰知足曰知止主靜立極

息事寧人也曰自牧曰百川謙能受益廣能容物
也曰三驅曰敬終樂不可極安不忘危也曰虛心
曰正身執兩用中表端自上也曰無謬賞曰無濫
刑是非存三代之公刑賞皆忠厚之至也大哉言
乎德業畢該閑存共貫說者謂貞觀之治幾於刑
措徵之力居多焉蓋人主惟一心而攻之者百危
微之界治忽因之少不自檢則一之數不敵夫百
之數而心之存焉者寡矣誠能念天命之靡常凜

民畧之可畏方朝乾夕惕之不暇而敢以逸豫為哉此十思一疏洵座右可銘千秋為鑑也雖然匪知之難行之斯難匪行之難終身而行之斯難賢如太宗治如貞觀而十思之後流為十漸然則慎厥始尚克圖厥終哉臣惟古者天子之聽政也士獻詩史獻書師箴諭賦近臣盡規庶人傳語臣不揣固陋敬揆斯義期於發明十思之旨依韻成章為十箴以獻其一曰情動則流主一則正收視於

無立體以靜母逸一身而竭百姓方寸之中萬物
托命惟時惟幾克念作聖其二曰周成靈臺民樂
上簡漢輶露臺上恤民產經野則殫體國以限宅
是丕基履若雲棧肯構肯堂式在方版其三曰居
高而倡下必應之匪惟我應物售其私為暄為潤
為怨為咨悔生於亢云何不危哲后視遠其惟聰
卑其四曰在器而欹在盈必反容之溉之何溢何
損海濶江長源深流遠端倪既呈怵惕恐晚水哉

水哉監於有本其五曰雅有吉日風有驕虞然而
禽荒奔車凜乎聲律身度無戯無渝亮乃庶事戒
於三驅子雲相如麗則非誣其六曰靡不有初鮮
克有終慎終如始道積厥躬健故無怠敬以守中
一其志氣與天地通翼翼勉勉純王之功其七曰
衡之在握鑑之在懸明乃昭質中乃達權穆穆以
處或失則偏察察為斷或失則專是故睿聖虛中
洞然其八曰取是為非變白為黑必有小忠以濟

罔極至誠如神端由敬德易事難說承家開國無偏無黨剛克柔克其九曰天道下濟煦枯而回無私者德亦必因材情溺則喜濫恩以開酬庸勸德貽厥方來無有作好迺言念哉其十曰明罰勅法在帝之欽時至秋肅而天何心怒一不測文乃刻深平情當理以為君臨刑措在古恥格斯今

史

唐玄宗開元二年秋七月焚珠玉錦繡於殿前帝以風俗奢靡乘輿服御金銀器玩宜令有司銷燬以供軍國之用其珠玉錦繡焚於殿前后妃以下皆無得服罷兩京織錦坊後帝使御史楊範臣入海南求珠翠奇寶範臣奏曰陛下前年焚珠玉錦繡示不復用今所求者何以異於所焚者乎帝遽引咎慰諭而罷之

給事中臣馬宏璣

司馬光曰明皇之始欲為治能自刻勵節儉如此
晚節猶以奢敗甚哉奢靡之易以溺人也詩曰靡
不有初鮮克有終可不慎哉

臣謹按明皇初志清明勵精圖治即焚珠玉錦繡
一節宜若身先節儉使天下移風而易俗者乃焚
之未幾旋復求之論者謂其有初鮮終而不知其
初原未嘗實也使其實有崇儉去奢之意則當如

漢文之身衣弋绨足履革舄不言躬行始終一轍
又何必舉珠玉錦繡焚諸殿前亟亟然表暴於衆
人屬目之地惟其亟於表暴而本心之誠不在是
無怪其前日焚之今日求之一人之身而前後矛
盾如此也顧從諫之美亦尚有足多者昔太宗初
平洛陽宮室宏侈者皆毀之未幾復發卒修宮以
備巡幸張元素以為何前日惡之今日效之其說
與楊範臣之直諫同太宗既因言而罷役明皇亦

聞奏而罷遣其虛以受人而不飾非以遂過也亦
同此開元之治所以幾於貞觀歟然矯強者僅飾
於一時面從者亦迫於法語明皇天性本不如漢
文之無欲而節以制度又不及太宗是以始為治
則戒奢靡從節儉行政聽言皆能矯其情之所便
厥後狃於晏安昏於嬖寵淫侈敗度咈諫拒言遂
至前後迴不相顧而以身治之者竟以身亂之然
則恭儉果可以聲音笑貌為哉

史

唐開元二十九年春正月立賑饑法制曰承前饑饉皆待奏報然後開倉道路悠遠何救懸絕自今委州縣及採訪使給訖奏聞

書法書美之也

修撰臣于敏中

臣謹按唐虞以來救荒之策備見於書曰政在養民則所以為民計者無弗周曰食哉惟時則所以

足民食者不容後也周官大司徒以荒政十有二聚萬民當時國用所通必有九年之蓄廩藏之設遍於天下歲或不登賑粟施惠一旅師遺人之屬司之而有餘惟其給之者便耳春秋而後耕三餘一之制不行秦饑乞糴於晉魯饑乞糴於齊至魏李悝始為平糴後世因之遂稱良法漢一海內分設郡縣撫綏安輯守令得以自行其意兩京循吏史不絕書由事權責於守令也耿壽昌之常平長

孫平之義倉朱子之社倉皆古今備荒善政然得
其人則為韓琦之廣惠倉失其人則為王安石之
青苗錢蓋唐宋以後設官寢多閭閻疾苦既不能
遽達於九閭為守令者又多掣肘旁撓不得以自
行其意一遇荒歉畏葸逡巡馴至於有司莫告安
得人人盡發粟之汲黯繪圖之鄭俠哉夫救荒猶
救焚也當其初發即為撲滅則匹夫匹婦一手足
之勞桔槔抱甕一轉移之便乃舍之不為而必呼

號奔走望救於通都大邑數十里之人則雖羣力畢集而燎原之勢成於俄頃必至蔓延而不可遏者此不待智者而知之也是以開元立賑饑法綱目大書而特予之蓋從來報荒之弊由於州縣之畏縮大吏之駁詰踏勘之遲延吏胥之科斂惟許其不待奏報即便開倉廩如慈母之乳嬰兒探懷而予更何有號泣徒聞待哺莫及者哉若云此法一行恐不肖有司將有詭飾災荒因緣為奸者竊

意有司即不肖豈獨無人心而敢蔑棄廉隅顯于
法令上不顧大吏之見聞下不畏道路之口實以
冒不測之誅也乎殆有以知其必不然矣伏讀

御製日知薈說極稱其法於當賑之刻不容緩奏報之
遲緩無濟剖晰精明尤為洞悉民隱今年七月中

奉

上諭訓誠督撫諄諄以不致玩視民瘼稽延時日為念
飭令地方官一遇水災驟至迅文申報督撫委員

踏勘設法賑濟務使早沾實惠大哉

皇仁懷保誠求恩同高厚蓋即開元之法以神明變化
之而所以體恤斯民之田禾廬舍資生無策者尤
為至周且切也惟是水旱之災事同一體州縣之
申報展轉既多踏勘之委員稽遲尤甚小民之饑
饉流離原處不能終日之勢必待申報之後再為
委員委員之後始許成災成災之後方議賑恤展
轉稽遲而窮谷深山嗷嗷待哺之民已多不及少

沾升斗而早填溝壑者矣然則即開元賑饑之法
而

特頒諭旨著為科條許自今州縣一遇歉歲督撫司道
各上官處同日通詳一面相其緩急即行給賑庶
親民之官得以自行其意或亦周禮遺人掌邦之
委積以待施惠旅師用三粟以惠民之制以仰副
聖天子養民之善政也乎臣謹即其義而敷陳之唯

聖明留意焉

史

唐德宗建中元年始作兩稅法

編修臣張映斗

臣謹按唐初賦稅之法曰租庸調有田則有租有身則有庸有戶則有調開元之末版籍寢壞賦斂迫趣取辦無準下戶率皆逃徙土著百無四五楊炎作兩稅之法按現在之田土歸諸丁戶計必需之經費徵以夏秋此兩稅之大槩固救時之良法


也然陸贊以為財之所生必因人力兩稅以資產為宗不以丁身為本以致挾貲轉徙者脫徭役守業不遷者困斂求夫丁身為本量力授田自古則壞以成賦未嘗頭會而箕斂也如慮挾貲而轉徙即按戶計丁安得盡考其貲如手實之法而等其賦稅乎呂祖謙謂兩稅立而三代之制皆不復見縱使屢復田租惟能惠有田之民不能惠無田之民抑思佃田之農雖非蠲復之年亦不肯聽豪民

之取盈至於不商不耕是為游惰王政方罰夫里
之布又何以稱焉且夫三代而後井田難復漢祖
始輕田稅至三十而稅一其時算賦錢自一百二
十至二十文帝更多減免故田稅隨田多寡而人
稅無分貧富魏晉以後戶賦始重然晉制丁男丁
女皆有占田則出此戶賦者亦皆有田之人非鑿
空而稅之也唐初之租庸調亦出於世業口分為
田百畝之中中葉之後田畝之在民者不能禁其

賣易而官亦無田可授向之所謂庸調者多徵自無田之人又經兵燹民多流移其可憑者獨田畝耳楊炎所以視大歷十四年墾田之數附丁戶於土田並為兩稅者也夫國家經費條款多端廉吏與龐民樂其歸并黠吏與莠民利其分折蓋歸并則明白易徵輸分析則紛紜難稽察也兩稅之行據土田以問業主至明晰也即物產以定貢賦至便利也徵以夏秋時不失也課惟二則民易知也

外此而戶口之盈虛人丁之耗息時有變遷即循
版籍之虛文難掩荒闢之實跡近世鱗冊之圖條
鞭之制實本於此然而兩稅之不免於詬病何也
唐之初合先代貢賦徭役之目而為租庸調至是
混租庸調之名而為兩稅前則兼該後復重出蓋
往往而有之此亦揚炎所不料也炎非唐之良臣
然兩稅之法豈得因其出於炎而過詆之哉

御覽經史講義卷二十八



總校官庶吉士臣侍朝

校對官編修臣許兆椿

謄錄貢生臣王嘉稷